

# Plidentau la fusiun senza idealisar

Ils presidents communal da Arosa, Ilanz/Glion e Scuol ein s'exprimi davart la vischnaunca fusiunada

■ (ac) La fusiun ha buca procurau per migliur. Las vischnauncas fusiunadas han fadigia dad anflar persunas promtas da surprender incaricas politicas communalas. In dils facits dad ina discussiun cun il presidents communal Lorenzo Schmid, Christian Fanzun ed Aurelio Casanova il gliendisgis vargau a Cuera els stabiliments dalla Scola alta per tecnica ed economia. Els ein stai involvai ella discussiun politica da fusiunar ed han silsuenter surpriu responsabladad politica els novs constructs communalas. Il gliendisgis vargau han ils presidents communal da Arosa (*Lorenzo Schmid*), dad Ilanz/Glion (*Aurelio Casanova*) e da Scuol (*Christian Fanzun*) da cumpignia cun *Ursin Fetz*, menader dil Center da management administrativ alla Scola alta per tecnica ed economia a Cuera, explicau lur experienzas davart las fusiuns. E gest pertuccont la participaziun politica els novs constructs communalas han ils treis presidents communal tratg las medemas consideraziuns. Tschercar persunas promtas da surpigliar ina incarica politica in vischnaunca ei buca vegniu pli sempel suenter la fusiun. Las experienzas dils treis representants dalla politica communal van a prau cun diversas examinaziuns fatgas en pliras vischnauncas fusiunadas en l'entira Svizra. Ton Ursin Fetz sco il menader digl Uffeci cantonal da vischnauncas, *Thomas Kollegger*, han plidentau quei svilup en lur referats introductiv alla runda da discussiun tgamunada dil cauredactur dil «BT», *Luigi Bürkli*. Secapescha che la situaziun finanziaria dalla vischnaunca fusiunada ei medemamein vegnida plidentada. Cunzun sin fundament dad ina expertisa publicada il december vargau cun la resumaziun che ha anflau in pulit resun. Spargnar daners



Han discussiunau ils fretgs dalle fusiuns communalas: Ursin Fetz, Aurelio Casanova, cun il meinadiscussin Luzi Bürkli, Christian Fanzun e Lorenzo Schmid (da sen.).

FOTO A. CADONAU

entras fusiunar vischnauncas seigi illusoric. La situaziun finanziaria dalle treis vischnauncas sedifferenziescha. Fanzun ha pudiu relatar dad ina buna basa finanziaria da sia vischnaunca che hagi saviu amortisar considerablamein ils deivets e che possi recaltgar entradas che lubeschien da far las investiziuns necessarias. El ha fatg attent che la vischnaunca da Scuol incasseschi buca meins che tschun milliuns francs tscheins d'aua ed ina eventuala sminuaziun da quella entradas munti ina sfida per sia vischnaunca. Profitau dils tscheins d'aua entras la fusiun ha medemamein la vischnaunca d'Arosa, ha Schmid detg e fatg attent che gest Arosa sez hagi aschia pudiu diversificar en vesta alla cumpleina dependenza turistica.

## Sbassau memia generus il pei da taglia

Alla vischnaunca dad Ilanz/Glion mauncan probabel gest ils tscheins d'aua en ina summa semeglionta sco la vischnaunca da Scuol. Casanova ei digl avis ch'ins seigi staus memia generus enteifer la fusiun cun sbassar il pei da taglia. El ha fatg attent als aults cuosts da sanar la canalizaziun ed ils conducts d'aua aschia che gest en quels segments possien las entradas buca curclar las expensas. Buca fetg incantaus ei Schmid dalla ulivaziun cantunala da finanzas. El ha fatg attent allas consideraziuns fatgas ella fasa dalla fusiun cun il resultat che la vischnaunca nova Arosa possi profitar el futur finanziamein dalla ulivaziun da finanzas. La

realitad actuala seigi uss ina autra, Arosa stoppi pagar. Discutau ha la runda era ils cuosts dall'administraziun communal. Lorenzo Schmid ha visau alla executiva e legislativa che hagian pudiu tener a mistregn il cuosts. Ed Aurelio Casanova ha concediu ch'ina certa professionalitad ella administraziun cuosti. Ella garantesch denton che certs mancos ell'infrastructura communal vegnien gudicai scosauda e las investiziuns succedien leu nua ch'ei fetschi da basegns. A liunga vesta ei il president communal dad Ilanz/Glion perschuadiu che la vischnaunca profiteschi finanziamein. Christian Fanzun da sia vart ha menziunau la structura turistica en sia vischnaunca. Entochen ussa seigien diversas fracziuns da Scuol organi-

sadas turisticamein en uniuns che concurrenzschien ina l'autra parzialmein. Ina caussa che seigi segramein buca optimala. Vinavon ha el menziunau la domanda dalla commembranza turistica futura da Zernez che seigi impurtonta per igl avegnir turistic da Scuol e dall'Engiadina Bassa. Lorenzo Schmid ha priu posiziun davart la differenta cultura dad Arosa e dalle ulteriuras vischnauncas dil Scanvetg che sedifferenzieschien fetg. Arosa, il liug turistic cun dabia midada enteifer la populaziun ed ils vitgs dil Scanvetg pli attaschai alla cultura muntagnarda. El ei digl avis ch'ei seigi probabel buca sempel dad unir quella duas vestas.

## Buca s'enriclaus

Tuttina ei Schmid perschuadiu dalla fusiun ed el quenta era da saver profitar egl avegnir dalla vischinonza da Cuera ed aschia carmalar habitonts els vitgs situai datier dalla capitala grischuna. Per Casanova ei la collaboraziun enteifer la regiun da gronda impurtanza ed el ha fatg attent alla conferenza dils presidents communalas habels ed intimai da promover quella collaboraziun. Kollegger ha menziunau la vischnaunca Bregaglia fermamein pertuccada dalla bova el vitg da Bondo. La presidenta communal *Anna Giacometti* fuss atgnamein stada envidada alla discussiun, ha denton stuiu desister. Il cau digl uffeci da vischnauncas ha menziunau il stab da crisa dalla vischnaunca da Bregaglia che seigi habels da duminar la sfida che fussi in bionton pli hanada per in vitget singul sco Bondo. La vischnaunca da Bregaglia seigi antruras sedecidida d'investar a Bondo en in rempar. Bondo persuls havessi buca fatg las investiziuns actualmein secumprovdas.

# Musica e sault dalle Dolomitas

Sentupada culturala culs Ladins dalla Val Gardeina a Mustér

DA HANS HUONDER / ANR

■ Il Forum intercultural Mustér organischa ina scuntrada culturala culs Ladins dalle Dolomitas. Suenter in di cun exerchezis communalas suonda ina presentaziun publica en halla Cons. Dapi sia fundaziun igl onn 1999 organischa il Forum intercultural Mustér repetidamein sentupadas ed arranschaments cun gruppas digl exteriur, denter auter era scuntradas da minoritads. Quellas ein sedadas grazia allas relaziuns dil forum cun l'Uniu federalistica dalle gruppas popularas dall'Europa (Fuev). 2005 ha il seminari internaziunal per minoritads linguisticas giu liug a Mustér e 2007 ei ina sentupada dils Aromuns da pliras tiaras suandada, organisada dalla fundaziun Convivenza en cooperaziun cun il forum. Sin iniziativa dil Fo-

rum cultural internaziunal Mustér – sco el vegneva numnaus lu – ha l'Europeada, il campiunadi europe da ballapei dalle minoritads linguisticas, giu liug el Grischun igl onn 2008. Ils davos onns ha il forum purschiu denter auter ina sentupada cun la cultura russa e la cultura africana ed avon dus onns ein ils responsabels sedecidi per ina scuntrada Svizra-Portugal. Quella ei sedada sin fundament dils biars Portughes che vivan e lavuran dapi onns ella regiun. Uonn stattan ils Ladins dalle Dolomitas ell'Italia el center. La fin d'jamna dils 9 e 10 da settember 2017 sescuntran gruppas dalla Val Gardeina cun scolars da musica e cun l'Uniu da costumes Mustér.

## Emprender in da l'auter

Cun ses arranschaments cun participaziun da gruppas d'altres minoritads e

tiaras promovava il Forum intercultural Mustér il brat cultural. El cass dalla sentupada culs Ladins dalle Dolomitas el Tirol dil sid stattan il sault popular e la musica el center. Lentschatta digl arranschament vegn fatga la sonda cun dus luvratoris. En quels emprendan la gruppa da sault da St. Ulrich e l'Uniu da costumes Mustér mintgamai dus saults tradiziunals da l'autra regiun e cultura. En in ulteriur luvratori da musica exerciteschan scolars e scolars dalla Scola da musica Surselva cun la gruppa da cant da St. Ulrich e sepreparan aschia per tocs musicals che vegnan allura presentai la dumengia al survetsch divin en baselgia parochiala da S. Gions. Sco quei che la presidenta dil forum, *Jacinta Jacomet-Lombriser*, di vegnan 25 persunas da St. Ulrich ella Val Gardeina a separticipar a

quei brat cultural a Mustér. Sper la gruppa da sault e cant ei quei era ina formaziun da cant da dunnas cul num «Grödnner Frauendreigesang» ensem cun dirigent e musicist *Otto Dellago*.

## In brat cultural

Il program uffical dalla dumengia entseiva allas 09.30 cul survetsch divin e vegn terminau entuorn las 16.00 en halla Cons. Leu vegn dau differentas produziuns, accumpignadas d'ina presentaziun dalla cultura dalla regiun dalle Dolomitas sco era d'in plaid dalla menadra digl Uffeci per cultura e lungatgs dil cantun Grischun, *Barbara Gabrielli*. A quella sentupada vegn surviu in genter cun specialitads dalle Dolomitas, denter auter bizochels cun jarvas, preparai da cuschinieras e cuschiniers dil hotel Rhä-

ta a Mustér e dalla mazlaria Pally a Curaglia. Tenor *Jacomet-Lombriser* duei la sentupada plidentar l'entira populaziun. Ils organisatur dil forum quantan cun rodund 120 persunas il di dalla presentaziun publica en halla Cons. «Ils Ladins ein fetg semeglionts a nus, buca mo pertuccont il lungatg. Lur cultura, mo era lur specialitads culinarias selaijan cumparegliar cun nossas tradiziuns», di la presidenta. Alla tscherca dil tema per uonn hagi la supprastanza dil forum viu spert che quella sentupada savessi esser in bien project ed ina buna caschun da sentupada cun ina cultura jastra, mo tonaton semeglionta alla nostra era pertuccont il lungatg romontsch.

Ulteriuras informaziuns: [www.forum-disentis.ch](http://www.forum-disentis.ch)



La gruppa «Grödnner Frauendreigesang» cul dirigent e ghitarist Otto Dellago.

Costums e saults gaudan ina gronda tradiziun a St. Ulrich ella Val Gardeina.

FOTOS MAD

